

兩
浙
名
賢
錄

兩浙名賢錄卷二十六目次

吏治

漢

蜀郡太守黃聖真昌

日南太守虞國

曾孫
誦附

鉅鹿太守謝堯卿夷吾

武源令楊聖儀扶

小黃令徐敬卿桐

三國吳

零陵太守徐元大陵

子平
附

晉

全椒令孔奕

宋齊梁陳

丹徒令沈嶢之

山陰令沈彥章憲

丘仲起附

晉陵太守謝方明

故章令丘德玄寂之

揚州刺史朱長明幼

餘姚令沈伯瑜瑀

子續附

合浦太守陳奉遷修

吳令孔琇之

永嘉守范子玄述魯

丘師施附

山陰令丘公信仲孚

吳郡守沈仲倫君理

弟君高附

鄱陽內史陸師卿襄

隋

益陽令蔣景倩邵

傳系附

唐

道州刺史厲文才

孫乾曜附

魏州司馬孔廣成昌寓

子附

廬州刺史羅珣

建州刺史李德新頻

東海尉阮孝郡詵

玉山縣丞周玄都諗

五代

知睦州吳正臣程

父蛻附

溫州刺史錢儼

湖州刺史沈韜文

父攸附

明州刺史黃晟

宋一

澤州守胡子正則

永嘉令仰仁謙

常熟丞郭慎求三益

湖南安撫使王敬素絲

海州盛使君京

子遵甫孫仲孫附

温州守石聖咨牧之

真定守沈子謙木

洪州推官錢德循還

順昌令俞仲寬備

從子克附

知海門縣沈興宗起

監洪州茶場沈嚴

轉運判官周敦夫師厚

西安令鄭光遠榮

知安吉縣陳安國輔

知邵武軍袁容直轍

子灼附

知杭州沈文通邁

監司何子溫琬

上元令元厚之絳

鹽鐵副使錢穀陽暄

姚源令姚舜徒孳

判潮州沈次仲造

循州守周文之彥質

福建路運判韋子駿驤

將樂令陳君益摠

知新昌縣劉德霖滂

知秀州姚令則憲

廣帥周勉仲自強

知海陵趙公舉汝能

仙居縣尉薛彥益朋龜

知成都蕭德起振

上虞令陳宜之炳

三山幕莫叔方琮

子三人附

知袁州王與道師心

隆興司法劉方叔鎮

季父兄附

知長洲虞賓

知臨安汪汝直思溫

弟思齊附

知侯官程喬仲樟

通判典國軍蔣仲可行簡

知武康范茂寬溶

知衡州王剛夫琰

兄瑛附

象山簿趙德老彥逾

知浦城朱藻

知宿松徐彥才良能

知江陰貝聖美欽世

知零都黃退翁邦彥

監登聞檢院袁君載采

知江陰徐希顏綱

子絕年逢年附

休寧宰陳元和曦

孫大震元孫伯愚附

兩浙名賢錄卷二十六目次終

兩浙名賢錄卷之二十六

東海徐象梅仲和氏撰

四明沈鳳舉靈翼氏閱

吏治

漢 共六人

蜀郡太守黃聖真昌

黃昌字聖真餘姚人本出孤微居近學宮數見諸生修庠序之禮因好之遂就經學又曉習文法仕郡爲決曹刺吏行部見而奇之辟從事後拜宛令政尚嚴猛好養

奸伏皆稱神明。遷蜀郡太守。先太守李根年老多悖政。及昌到。吏民訟者七百餘人。悉爲斷理。莫不得所。密捕盜帥一人。脅使條諸縣強暴之人姓名居處。乃分遣掩捕。無有遺脫。宿奸大惡皆奔走他境。遷河內太守。徵拜將作大匠。進補大司農。左轉大中大夫。卒於官。

日南太守虞國

魯孫頡附

虞國餘姚人。少有孝行。歷官日南太守。以化治稱。常有雙雁宿止廳事。每出行縣。輒飛逐車。國卒於官。雁逐喪至姚棲墓上不去。至今呼其地曰雙雁國。有從魯孫頡

亦守日南稱小真

鉅鹿太守謝堯卿夷吾

謝夷吾字堯卿山陰人少爲郡吏太守第五倫禮信之
舉孝廉爲壽張令永平十五年蝗發太山流徙郡國泔
食五穀過壽張飛逝不集稍遷荊州刺史章帝駕幸魯
陽詔夷吾錄囚夷吾決正一縣三百餘事事與上合上
歎息曰諸州刺史盡如此朕不憂天下遷鉅鹿太守所
在愛育人物有善績第五倫嘗令班固爲文薦之後以
行春乘柴車從兩吏冀州刺史上其儀序失中有損國

體左轉下邳令夷吾尤善風角占候嘗豫尅死日如期
果卒勅其子曰漢末當亂必有發冢露骸之禍使懸棺
下葬墓不起墳

武源令楊聖儀扶

楊扶字聖儀浦江人爲武源令有惠政人爲之謠曰楊
聖儀政多奇官終交州刺史

小黃令徐敬卿桐

徐桐字敬卿由拳人少爲獄吏執法詳平遷小黃令時
陳留遭蝗野無遺草過小黃飛逝不集刺史行部奏桐

他事桡弃官。蝗應聲至。刺史媿謝。令還舍。蝗卽遠去。後爲長沙太守。

三國吳

共二人

零陵太守徐元大陵

子平附

徐陵字元大。龍游人。初爲縣吏。衆所未識。會稽虞翻一見卽與友善。歷三縣長。所在著稱。遷零陵太守。時朝廷待以列卿之位。故翻書曰。元大受上卿之遇。叔向在晉。未若於今。其見重若此。子平字伯元。童胤知名。翻甚愛之。諸葛恪守丹陽。討山越。以平威重。有思慮。可與効力。

請爲丞稍還武昌左部督傾心接物士卒皆爲用初平
爲恪從事禮意甚薄及輔政待平益疏後恪被害其二
建亡爲平部曲所得平使遣去其篤厚多類此

晉 凡一人

全椒令孔奕

孔奕餘不亭侯愉之族父也爲全椒令明察過人時有
遺之酒者始提入門奕遙呵之曰人餉吾兩甕酒其一
何故非也檢視一甕果是水或問奕何以知之奕曰酒
重水輕提酒者手有輕重故耳在官有惠化及卒市人

若喪慈親焉

宋齊梁陳 共十六人

丹徒令沈嘖之

沈嘖之吳興人爲丹徒令自以清介不事左右浸潤日至遂鎖繫上方歎曰一見天子足矣上召問曰復欲何陳答曰臣坐清所以獲罪上曰清何故獲罪曰無以承奉要人上曰要人爲誰嘖之以手板四面指曰此赤衣諸賢皆是若臣得更鳴必令清譽日至上知其無罪重除丹徒令入縣界吏人候之謂曰我今重來當以人肝

代米不然清名不立

山陰令沈彥章憲丘仲起附

沈憲字彥章。演之從祖弟子也。少有幹局。爲駕部郎。補烏程令。甚著政績。太守褚彥回歎美。以爲方圓可施。武陵王曄爲會稽。以憲爲左軍司馬。齊高帝以山陰戶衆欲分爲兩縣。武帝啓曰。縣豈不可御。但用不得人耳。乃以憲帶山陰令。政聲大著。孔稚圭請假東歸。謂人曰。沈令料事。特有天才。後除散騎常侍。未任卒。同郡丘仲起先爲晉平。清廉自立。褚彥回歎曰。目見可欲。心能不亂。

此丘公所以遺子孫也。仲起字子震，位至廷尉卒。

晉陵太守謝方明

謝方明，上虞人。伯父邈爲孫恩所殺。方明以邈舅子馮嗣之等與恩通謀，因結邈門生計嗣之等而手刃之。頃之，孫恩重陷會稽，謝琰見害，因急購方明。方明於上虞載母妹奔東陽，因還寄居國學，流離險危，屯苦備經，而貞履之操在約，無改。桓玄克建業，丹陽尹卞範之勢傾朝野，欲以女嫁方明。方明終不回。桓玄聞而賞之，卽除著作佐郎，以薦爲宋武中軍主簿，轉從事中郎，仍爲右

將軍道憐長史武帝令府中衆事皆咨決之尋加晉陵
太守嘗年終獄中繫囚無輕重悉放歸家使過正三日
還到罪重者二十餘人綱紀以下莫不疑懼因諫以爲
昔人雖有其事或是記籍過言且當今人情僞薄不可
以古義相許方明不納一時遣之囚及父兄竝驚喜涕
泣以爲就死無恨至期皆還無一逃者遠近歎服宋武
受禪位侍中丹陽尹有能名轉會稽太守江東人戶殷
盛風俗峻刻強弱相凌姦吏蜂起符書一下文攝相續
方明深達政體不拘文法濶略苛細務在統領貴族豪

士莫敢犯禁。除此伍之坐判。又繫之獄。東土歌詠之。陸尤愛惜。未嘗有所是非。承代前人。不易其政。必宜改者。則漸變。使無迹可尋。卒於官。

故鄆縣令丘德玄寂之

丘寂之字德玄。吳興烏程人。年十七。爲州西宮兼直主簿。刺史王彧行部。夜還前驛。已至。而寂之不肯開門。曰。不奉墨青。或方於車中作教。然後啓關。彧歎曰。不意鄆君章近在閣下。卽轉爲主簿。遷故鄆令。在縣專以廉潔御下。一時稱爲良吏。

揚州刺史朱長明幼

朱幼字長明義烏人臨海太守洸之曾孫也歷商辛平
昌淮陽三郡太守政績懋著遷揚州刺史兼度支使悉
心撫字民得其所揚人德而歌之曰朱幼渡江東人安
盜賊空課治者每稱爲第一

餘姚今沈伯瑜瑀

子續附

沈瑀字伯瑜吳興武康人父昶事宋建平王景素景素
謀反昶先去之及敗坐繫獄瑀詣臺陳請得免罪由是
知名司徒竟陵王子良引爲府行奉軍領揚州都督

事時建康令沈徽孚恃勢傲瑀瑀以法繩之衆憚其強
子良薨瑀復事始安王遙光令瑀專知州獄事湖熟縣
方山埭高峻冬月公私行侶以爲艱明帝使瑀行修之
瑀乃開四洪斷行客就作三日便辦揚州書佐私行詐
稱州吏不肯就作瑀鞭之四十佐歸訴遙光遙光曰沈
瑀必不在鞭汝覆之果有詐明帝復使瑀築赤山塘減
材官所量數十萬帝益善之爲建德令教人一丁種十
五株桑四株柿及梨栗女子丁半之人咸惟悅頃之成
林入梁爲尚書駕部郎兼右丞以母憂去職起爲餘姚

令縣大姓虞氏千餘家請謁如市前後令長莫能絕自
瑀至非誦訴無所通縣南又有豪族百家子弟縱橫
相庇廕百姓甚患之瑀召其老者爲石頭倉監少者補
縣僮皆號泣道路自是權右屏跡後爲蕭穎達長史瑀
性傾強每忤穎達穎達銜之天監八年因人啓事辭又
激厲穎達作色曰朝廷用君作行事耶瑀出謂人曰我
死而後已終不能傾側而從是日於路爲人所殺多以
穎達害焉子績累訟之遇穎達尋卒事不窮竟績乃布
衣蔬食終其身

合浦太守陳奉遷修

陳修字奉遷東陽人起家爲穀城令遷合浦太守大著
治聲嘗以喪紀之法遍書於縣使民知習卒於官合浦
民懷其德護喪歸葬執紼行數千里無一人言疲者既
葬哭奠而後去

吳令孔琇之

孔琇之會稽山陰人尚書令靖之孫著作郎靈運之子
有吏才事齊爲吳令有小兒年十歲偷刈隣家稻一束
琇之付獄案罪或諫之琇之曰十歲便能爲盜長大何

所不爲。卒論如律。一縣肅然。遷尚書左丞。又以職事知名。後兼左戶尚書。廷尉卿。出爲臨海太守。在任清約。罷郡還。獻乾姜二千斤。齊武帝嫌其少。及知琇之清。乃歎息出監吳興郡。尋拜太守。政稱清嚴。隆昌元年。遷晉熙王冠軍長史。江夏內史。行郢州事。明帝欲令殺晉熙琇之婢。不許。欲自引決。友人陸閑諫之。琇之不從。遂不食而死。

永嘉太守范子玄述魯

丘師施附

范述魯字子玄一字頴彥吳郡錢塘人也幼好學從餘

杭呂道惠受五經略題章句道惠曰此子必爲王者師
齊文惠太子竟陵文宣王幼時齊高帝引述曾爲之師
友起家宋晉熙王國侍郎遷太子步兵校尉兼開陽令
述曾爲人蹇諤在官多所諫諍太子與竟陵深相器重
號爲周舍齊明帝卽位爲永嘉太守政務清平不尚威
猛民俗便之所部橫陽縣山谷險峻爲逋逃所聚前後
二千石討捕莫能息述曾下車開示恩信凡諸凶黨強
負而出編戶屬籍者三百餘家自是商旅流通行人安
業勵志清白不受餽遺徵爲遊擊將軍都迭故舊錢二

十餘萬一無所受惟得白桐木火籠杵十餘枚而已梁武帝踐祚以爲太中大夫述曾平生所得俸祿皆以分施及老壁立無資以天監人年卒注易文言及雜詩賦數十篇後有興興丘師施亦以庶潔稱罷臨安縣還惟有數篋簿書並是倉庫券帖官時以比述曾

山陰令丘公信仲孚

丘仲孚字公信靈輅從兄也少好學讀書常以中宵鐘鳴爲限靈輅常稱爲千里駒齊永明初爲國子生王儉曰東南之美復見丘生舉高第調還鄉里家貧乃結

羣盜爲之計。劫掠三吳。仲孚聰明有智略。羣盜畏服。所
行皆果。故亦不發爲于湖令。有能名。太守呂文懿當世
倖臣。陵詆屈縣。仲孚獨不爲屈。明帝卽位。爲曲阿令。會
稽太守王敬則反。乘朝廷不備。反問至。而前鋒已屈曲。
阿仲孚鑒長岡埭。瀉濟水以阻其路。敬則軍至。遇濟水。
涸果頓兵。不得進。遂敗。仲孚以拒守功。遷山陰令。居職
甚有聲稱。百姓謚曰二傅。沈劉不如一丘。前世傅琰父
子。沈憲劉玄明相繼宰山陰。並有政績。言仲孚皆過之。
齊末政亂。頗有賕賄。爲有司所舉。將見收。竊逃還會稽。

不問梁武帝踐祚復爲山陰令仲孚長於撥煩善適權
變吏人敬服號稱神明政爲天下第一後爲衛尉卿恩
遇甚厚遷豫章內史在郡更勵清節頃之卒贈給事黃
門侍郎喪將還豫章老幼號哭攀送車輪不得前所著
有皇典二十卷南宮故事百卷又撰尚書具事雜儀行
於世

吳郡太守沈仲倫君理

弟君高附

沈君理字仲倫吳興人父僧曼梁左戶尚書父巡少府
卿君理美丰儀博涉有識鑒陳武帝鎮南徐州巡遣君

理致謁深見器重尚會稽長公主及帝受禪拜附馬都尉封永安亭侯爲吳郡太守時兵革未寧百姓荒弊君理總集士卒修飭器械以幹理見稱累遷左戶尚書爲東陽太守以父艱去職歷位太子詹事吏部尚書宣帝以君理女爲皇太子妃贈爵望蔡縣侯位侍中尚書右僕射卒贈翊左將軍開府儀同三司謚曰貞憲弟君高字季高少知名性剛直有吏能位衛尉卿平越中郎將都督廣州刺史甚得人和卒謚祁子

鄱陽內史陸師卿表

陸襄字師卿揚州別駕閏之第四子起家著作佐郎昭明太子聞襄業行啓武帝引與游處除太子洗馬遷中書舍人並掌管記書爲揚州中從事以父終此官固辭不許聽與府司馬換厠居之復爲太子家令以母憂去職襄年已五十毀頓過禮太子憂之日遣使誡諭大通七年出爲鄱陽內史先是郡人鮮于琮服食修道法常入山採藥拾得五色幡昵又於地中得石璽竊怪之琮先與妻別室望琮所處常有異氣益以爲神大同元年遂結門徒殺廣晉令王筠號上願元年署置官屬其黨

轉相誑惑有衆萬餘人將出攻郡襄先已率人吏修城
隍爲備及賊至破之生獲琮時隣郡豫章安成等守牢
案其黨與因求貨賄不得其實或有善人盡室罹禍襄
郡枉直無濫人作歌曰鮮于抄後善惡分人無橫死賴
陸君又有彭李二家先因忿爭遂相誣告襄引入內室
不加責誚但和言解喻之二人感恩深自悔咎乃爲設
酒食令其盡飲同載而還因相親厚人又歌曰陸君政
無怨家聞旣罷讐共車在政六年郡中大寧擢爲度支
尚書侯景圍臺城以襄直侍中省城陷還吳一夜憂憤

而卒。褻弱冠，遭家禍，釋服猶若居憂。終身蔬食布衣，不聽音樂，口不言殺害。五十年，侯景平，追贈侍中，封餘干縣侯。

隋 共二人

益陽令蔣景倩邵

傳柔附

蔣邵字景倩，婺之浦江人，爲益陽令，攘虎却蝗，民蒙其惠。遷洪撫二州刺史。時同邑傅柔字仲席，令宣城，無爲而治，謳歌載路。官終鄂州刺史。同邑而有二循吏，一時仕路以爲楷模。

唐 共八人

道州刺史厲文才 係乾曜附

厲文才東陽人貞觀初爲道州刺史南土未靖賊寇猖獗臨郡暮月羣盜悉平甚著威愛改容州刺史雅好山水每興至獨往若不知有替組在身者未幾竟解綬歸孫乾曜高尚有祖風

魏州司馬孔廣成昌寓 子祖舜附

孔昌寓字廣成越州山陰人梁侍中休源之六世孫也貞觀中以對策高第歷魏州司馬有治狀帝爲不置刺

史爲政三年。聖書褒美。進膳部郎中。子祖彥字奉先。官
監察御史。以累下除成武令。雉駟於庭。人以比漢之魯
中牟父子相繼爲循吏。說者謂山陰孔氏家傳有宦譜。
廬州刺史羅珣

羅珣會稽人。寶應初。詣闕上書。授太常太祝。曹王臯領
江西荆襄節度使。署珣幕府。遷副使。臯卒。軍亂。劫府庫。
珣取首惡十餘人斬。以徇。環棘庭中。俾投所劫庫物。一
日皆滿。乃貰餘黨。召爲奉天令。中官出入輦道。吏緣以
犯禁。珣榜笞之。雖死不置。自是屏息。擢廬州刺史。修學

官政教簡易有芝草白雀之祥再遷京兆尹請減平糴半以常賦克之人賴其利以老疾求解徙太子賓客累封襄陽縣男卒謚曰惠

建州刺史李德新頻

李頻字德新壽昌人少秀悟工屬辭於詩尤所長舉進士遷武功令畿民多籍神策軍吏以其橫類假借不敢繩以法頻至有神策士尚君慶通賦六年不送頻卽械送獄盡條宿惡請於尹殺之豪滑大驚屏息奉法縣大治有六門堰者廢廢五百五十年方歲飢頻發官廩庸

民浚渠按故道。廨水溉田。穀以大稔。懿宗嘉之。擢侍御
史。守法不阿。徇累遷都官員外郎。表乞建州刺史。既至。
以禮法治下。更布條教。時政亂盜興。而建賴賴以安。卒。
官喪歸。父老相與扶柩葬。永樂州爲立廟。梨山歲祀之。
東海尉阮孝郡詵

阮詵字孝郡。奉化人。通開元禮。穀梁春秋。不徒習其辭。
動有程法。海右士舉襲其淳風。父較爲太子右贊善。大
夫舉進士。一不第。卽以父任爲太廟齋郎。歷臨黃東海。
尉東海有父子異居者。子不爲養。詵使人問之。對曰。無

以奉也遺之內米且以其贏資之其子卒悔悟克孝尋
調婺州法曹叅軍累遷大理評事先是湖湘好鬼歲取
室女爲人牲積以成俗女之父母亦惑於巫言聽命恐
後詭乃命縛老巫數輩若將就屠者衆皆叩頭祈哀乃
杖巫長而遺之期後不悛悉以巫赴令令當面祀宜得
厚福邑里蒙化積習遂除後以員外司勳尚書郎挂冠
歸里與里中謝徵士果臺二三名士徜徉以終

玉山縣丞周玄都諡

周諡字玄都奉化人歷官玉山縣丞州牧廉其材每使

推勘疑獄。念飲水勵操。夙夜檢勘。以副知己。遂以苦心
邁疾卒。

五代

共六人

知睦州吳正臣程

父蛻附

吳程字正臣。山陰人。父蛻大順中登進士。累官禮部尚
書。程初以父蔭不事苦學。或謂程曰。觀子骨法。與羣儒
類。但恨他日登將相。不長談論耳。程遂勤學。錢鏐選婚
於士俗。以女妻之。元瓘襲國。命程知睦州。深達治體。與
民休息。時雖重歛。而程結以恩信。民皆樂輸。無怨言。尋

拜丞相授威神節度使軍政嚴肅卒謚忠烈

溫州刺史錢儼

錢儼吳越王之子初爲威武軍節度使移溫州刺史河
曉政術吏不敢欺政尚寬惠民悅慕之後移蘓州民有
携家從之者號隨使戶

湖州刺史沈韜文

父攸附

沈韜文吳興人父攸常州刺史韜文性介潔好學能屬
文吳越時爲元帥府典謁叅畫軍務有所裨益出牧鄉
郡以爲湖州刺史以清白自勵雖時當擾攘不爲習俗

所移親戚閭里皆帖然服其不私

明州刺史黃晟

黃晟鄞人時盜賊熾起授晟爲散騎常侍明州刺史討平隣寇保護鄉井境內以安晟尤能禮士江東儒彥多依之築其居號曰措大營

宋一 共五十九人

澤州守胡子正則

胡子正少倜儻負氣初吳越間不設貢舉儒風爲息則獨蒐經史屬文辭及歸宋遂登端拱二年第踐更

中外凡四十七年。初爲僉書。貝州節度觀察判官公事。命行河北路。省去民冗役幾十萬數。守潯州。虎爲患。則禱之城隍。翌旦得死虎於廟中。提舉江南銀銅場鑄錢監。按永豐監得匿銅數十萬斤。咸以羨餘籍之。不復坐。主吏活宜州重辟九人。奏減福唐官田數百頃。估鈔領三司使。不以刻下爲功。福唐前邵將被訟去官。事連其所延蜀儒龍昌期。及則下車。昌期械至。則釋之。而見以賓禮。自以俸金償其所當入官錢。則篤風義。臨事得法。外意輕財。尚施不爲私積。世多稱之。則本婺人。凡再牧

杭州加兵部侍郎致政退居西湖與交親笑歌浩如也
卒年七十七葬錢唐初則守陳州范仲淹爲作則以國
士遇之故其卒也仲淹實銘其墓

永嘉令仰仁謙

仰仁謙興興人以太子舍人知永嘉庶慎有容撫民如
子時錢氏方歸疆土仁謙始爲邑令政事一新人爲改
觀

常熟丞郭慎求三益

郭三益字慎求海鹽人與父琢皆舉進士三益爲常熟

丞才高有器識常平使者調蘓湖常秀濟青龍江分地
程役三益所部前期告辦使者留其人使助他邑三益
曰非法也使勤者助役何以警惰竟引歸後累官刑部
尚書同知樞密院事

湖南安撫王敬素絲

王絲字敬素蕭山人真宗時舉進士任興國軍司理蒞
重辟十有一人郡稱神明秩滿除台州軍事判官州少
井人病之絲陶土爲筒引山泉入城每五里一穴以濟
行者旋判衢州有惠政外臺移領婺州衢州人爭於境

上曰表州一鑑何爲見奪至婆雪民冤抑民爭肖像而
祀之拜御史會湖南蠻叛攻邵縣詔綏安撫湖南至則
咨察利病而前帥立重賞以誅蠻人一級萬錢士卒往
往戕樵餉者以爲功綏下令得賊首者必指其開地以
爲質其可擒者當生致之是自無枉戮者終尚書兵部
員外郎

海州盛使君京

子遵肅孫仲孫附

盛京餘杭人咸平元年登進士第歷官諫議大夫出守
江寧以老乞使郡詔移海州天資仁厚不忍以法繩下

而吏民化服亦不忍欺在官民愛旣去民思仕終工部侍郎後十年子遵甫以光祿丞通判海州歲旱發公私藏粟以廩民全活甚衆又設方略捕奸盜發輒得又四十餘年遵甫之子仲孫以朝奉大夫守海州暮年大治邦人有盛使君家兒世世循吏之稱

溫州守石聖咨牧之

石牧之字聖咨新昌人第進士試校書郎移天台今有能名時王安石知鄞陳古靈知仙居號江東三賢最後知溫州有母訟不逆者牧之爲勸諭卒成孝子鹽城時

有海寇牧之募壯士時訓練寇不敢犯爲民興利剗弊
溫人甚德之所著有往生錄易論解雜文歌咏共七卷
真定守沈子謙小

沈本字子謙崇德人第進士宰石城汀寇倡獮邑豪熊
子開溫老虎等爲寇鄉導巡尉司妄指同姓者捕之本
察其非是破械使捕子開等邑境遂安擢守真定民有
以田多賦少告訐其仇者本謂東西無疆界冒占者衆
不可勝詰亟懲遣之有建議籍民所據官田爲屯可以
富國經制司委州根據株連六七百家本曰此事行則

變生矣。亟以前牘上之。議遂寢。邊民大悅。

洪州推官錢德循適

錢適字德循。浦江人。自少強敏。記問過人。登熙寧九年進士。調洪州推官。守將王韶由樞府出。威重異常。僚屬不敢仰視。會有疑獄。適正色爭之。至怒詈不少奪。後卒如適議。遷通判越州。吏挾守爲奸。留難訟者常數百人。適攝府事。纔二日。獄爲一空。擢殿中侍御史。出提舉湖北常平。興利除害。發奸擿伏。風采凜然。人畏之如神明。尋進中丞。爲言者所論。出知外郡。歷滁。宣。秀。越。四州。浮

沈者久之大觀初復故職以疾致仕家居十餘年修築
三大湖以利鄉民民德之宣和二年方臘陷婺城遁避
兵蘭谿靈泉寺爲盜所害事聞贈太中大夫

順昌令俞仲寬儻

從子克附

俞偉字仲寬鄞人宰劔南之順昌閩人生子多者皆不
舉建劔尤甚儻作戒殺子文召父老列坐廡下以儻置
醪醴親酌之使歸勸鄉人活者以千計生子多以俞爲
字朝廷爲立法行之一路偉嘗被差他郡還邑有小兒
數百迎於郊部使者聞於朝降詔獎諭進秩再任許出

乘以賑其罄卧而貧者從子克字公達以著作佐郎遷
檢正後除天章閣待制知慶元府時環州有田與夏國
相連終克任檄所部以時耕種虜不敢犯屬羌山夷嘯
聚皆叛克授第二將張守約籌筭且招且討有亾入夏
國者三百戶克又遣守約耀兵塞上夏人亟歸亾者條
上勸賞買馬之法騎馬頓增慶兵素玩恩克繼以法軍
如肅然未幾暴卒

知海門縣沈典宗起

沈起字典宗鄞人慶曆二年進士第調滁州判官監真

州倉聞父病委官歸侍以喪免有司劾其擅去終喪薦
書應格當遷仁宗曰觀過知仁今由父疾致罪何以厚
風教而勸人子乃特遷之知海門縣縣負海地卑潮間
冒民田舍民徙以避弃其業起爲築隄百里引江水灌
溉其中田益闢民相率來歸立祠以報御史中丞包拯
舉爲監察御史京東歲飢盜起除提點刑獄至則開首
贖法携其伍盜內自矜疑轉相束縛惟恐後改開封府
判官爲湖南轉運使凡羽毛筋革舟楫竹箭之材多出
所部取於民無制吏挾爲姦起會其當用自與商人買

所省十六七召爲三司鹽鐵副使遷陝西都轉運使
慶州兵變起討平之入知吏部流內銓奉使契丹位著
乃與夏使等起曰彼陪臣耳不當與王人齒辭不就列
遂陞東朝使者自是遂爲定制拜天章閣待制知桂州
時交趾歲時侵擾起治舟師習水戰銳意攻討交趾故
與內地貿易悉禁止之邕州守蘇緘力陳不便起劾緘
沮議徙知潭州後交趾大舉兵陷欽邕廉白四州起坐
首議邊失計謫郢州團練使未幾徙越又徙秀州卒

監洪州茶場沈巖

沈嚴德清人大中祥符八年蔡齊榜進士初監洪州武寧茶場兼領縣事吏畏其廉民懷其愛及卒貧不能葬太守滕元發爲葬於德清之永和鄉范仲淹銘其墓

轉運判官周敦夫師厚

周師厚字敦夫鄞人皇祐五年進士仕至朝散郎荆湖南路轉運判官時役法方行師厚言四方風俗不同役有勞逸輕重不宜槩賦朝議是之章惇聞嘆蠻獫辰沅二州議輸常平粟以備邊師厚持不可曰溪獫靜擾無常常平歲入有程當使邊卒廣屯田爲便卒從其議

西安令鄭光遠榮

鄭榮字光遠壽昌人幼聰敏有才思力學不厭七歲能綴文登天禧三年進士第天聖初奉使契丹嚴毅威重虜深敬憚之使回真宗曰使於四方不辱君命今見其人矣授崇寧令以外艱去服闋起知衛之西安庶能才幹深得民心卒官民撫柩攀號護其喪還葬爲立去思亭於境上

知安吉縣陳安國輔

陳輔字安國象山人登嘉祐二年進士知安吉縣活流

民千餘人會攝他縣民遮道乞留使者王介曰安吉寧
可無陳令耶卒反之朝廷以戶高下分爲七十五等輸
役錢翰林沈括察訪二浙俾輔掌其事遂以其法行浙
東輔少貧刻意問學夜置足水中以警寢蚤以文詞擅
場屋東明劉溫奇之使其子樂師焉後熙試禮部第一
益有名以薦知邛州丞相呂大防范純仁欲用輔竟以
疾卒

知邵武軍袁容直轍

子均附

袁轍字容直鄞人登嘉祐六年進士第少以詞賦得名

始試於鄉再試開封皆第一嘗言于公治獄多陰德使
我持三尺獄寧有冤者乎爲尉建安令杭州南新胫州
錄事參軍所治獄無不盡其情部使者二十人交薦之
知邵武軍條鹽法利害以便民奏減其課郡人祠之徙
處州未幾告老所著有韻類一百卷行於世子灼進士
第官至尚書倉部郎中守婺州武臣曹宗姻黨數犯法
灼械於獄斃之宗怒鏤其秩後爲倉部以清心省事安
不忘危爲言甚切直黜知泗州

知杭州沈文通邁

沈遵字文通錢塘人以蔭爲郊社齋郎舉進士廷唱第
一大臣謂已官者不得先多士乃以遵爲第二通判江
寧府歸奏本治論仁宗曰近獻文者率以詩賦豈若此
十篇之書爲可用也除集賢校理修起居注遂知制誥
坐事出知越州徙杭州爲人踈黨博達明於吏治令行
禁止民或貧不能葬給以公錢嫁孤女數百人倡優養
良家子者奪歸其父母善遇僚寀皆甘樂傾盡爲之耳
日刺間巷長短纖悉必知事來立斷禁捕西湖魚蟹故
人居湖上蟹夜入其籬間適有客會宿相與食之旦詣

府憲迎語曰昨夜食殯美乎客笑而謝之小民有犯法
情稍不善者不問法輕重輒刺爲兵姦猾屏息召知開
封府遷龍圖閣直學士治如在杭州垂帷視事逮午而
畢出與親舊還往從容燕笑沛然有餘職士大夫交稱
其能拜翰林學士判流內銓丁母憂英宗閱其去賁黃
金百兩仍命扶喪歸葬廬墓下服未竟而卒年四十世
谷惜之

監司何子溫琬

何琬字子溫龍泉人皇祐進士七歷監司神宗疏其名

於屏曰政事何玳文章素濟除龍圖閣學士王荆公薨
東坡有詩倡和

上元令元厚之絳

元絳字厚之錢塘人登進士第調江寧推官攝上元令
民有號王豹子者豪占人田略男女爲僕妾有欲告者
則殺以滅口絳捕置於法甲與乙被酒相毆擊甲歸臥
夜爲盜斷足妻稱乙告里長執乙詣縣而甲已死絳鞫
其妻曰歸治而夫喪乙已伏矣陰使信謹吏迹其後望
一僧迎笑切切私語絳命取僧繫廳下詰妻姦狀卽吐

實人問其故。絳曰：吾見妻哭不衰，且與傷者共席而齋，無血汚，是以知之。安撫使范仲淹表其才，擢知永新縣。豪子龍聿誘少年周整飲博，以技勝之，計其貲折取上腴田立券。久而整母始知之，訟於縣。縣索券爲証，則母手印存，弗受。又訟於州。於使者擊登聞鼓，皆不得直。絳至，母又來訴。絳視券呼謂聿曰：券年月居印上，是必得周母他贖尾印而撰僞契續之耳。聿駭謝，即日歸整田。轉知海門，擢江西轉運判官，知台州。大水冒城，民廬蕩析。絳出庫錢卽其處作室數千區，令人自占與期。三歲

償費流者皆復業。又甃其城，因門爲庫，以禦湍漲。後人守其法，入爲度支，判官儼智高反，以直集賢院爲廣東轉運使，軍食有餘，以功遷工部郎中，歷進翰林學士，知開封府，拜三司使，參知政事，坐子者寧累，罷知亳州，乞改潁，明年加資政殿學士，以太子少保致仕。絳所至有威名而無特操，少儀矩，然王於文辭，爲流輩推許。絳在中書而番夷書詔猶出其手。卒年七十六，贈太子少師，謚曰章簡。

三司鹽鐵副使錢載陽

錢暄字載陽惟演之子任郎官知開撫台三州有治績除少府監又知鄆州爲三司監錢副使時勾考諸路逋租兩浙轉運使當坐負暄因對從容爲言逋租不入以頻年飢故今使者被罪必亟歛恐民不堪惟稍寬乃可集得免出知鄆州除寶文閣待制卒暄素好學通達治體所至不爲赫赫名而旣去見思十二子內景臻封康國公尚仁宗女許國大長公主生榮國公忱忱生叅政端禮端禮孫左丞相象祖自有傳

姚源令姚舜徒學

姚萼字舜徒，慈谿人。登熙寧九年進士第，歷尉掾。以考第薦，章應格，改秩爲桃源宰。承虐政後，訊民之疾苦而振雪之。郡將怙威凌僚吏，屬邑悉苦。萼毅然諍論，郡將爲之少戢。旁郡有訴不平，必丐於部使者，付萼決之。鄉有虎患，以文請諸社，越三日虎仆祠旁。奏課爲天下第一。部使者舉萼學行優異，才能顯著，以應元符之詔。賜對稱旨。除提舉成都府路常平等事。陛辭上諭以卿任饒源有愛民之心，退謁丞相論蜀道利疚，乞以義倉之儲置吏，以收養鰥寡老幼，死給衣裳，官爲歛葬，歲葺

飢問有遺兒。請雇。姬乳之。丞相爲奏行焉。除直龍圖閣。知夔州。興學校。勸農桑。有古循吏風。卒之日。夔民罷市。聚哭於牙門外。計開桃源民卽孳生祠。爭出錢聚僧道。薦奠其爲民所思如此。

判潮州沈次仲造

沈造字次仲。縉雲人。以進士歷官通判。庶直不阿。一心民事。故隨在有美頌。初知漳浦。海寇作亂。將及境。聞造有政聲。卽引去。曰。毋驚沈公。及判潮時。有韓山神。歲須男女以祭。歷政畏憚之。修饗不敢。後時造焚其廟。毀像。

得巨地殺而烹之。凶祀遂絕。議者以方韓昌黎之驅鯨云。造卒潮民相率聚哭祠下三日始去。工書善文章。有文集二十卷。胡權評其書似歐陽率更而清勁過之。

循州守周文之彥質

周彥質字文之。江山人。以進士第。歷官循州守。治民以教化爲本。民以訟至庭者。先諭以禮義。然後折其是非。無不涕泣悔罪而去。久之。民以訟爲耻。蒲鞭遂懸而不試。蘓軾以默化名其堂。官終發運使。所著有齊峯集。行於世。

福建路運判韋子駿驤

韋驤字子駿錢塘人生而警敏年十七以文謁王安石大奇之曰吾行江南人興越見文士惟子與董頴行耳由是名藉甚每一賦成學者傳誦登進士第累遷至屯田員外郎主少府監簿以薦擢利州路運判移福建時年飢議請賑貸驤曰閩去京師往反數千里今民朝不及夕上書待報是冠冕從容以救焚溺也乃檄州縣發廩而請違法之罪於朝闕寇阻險爲數州患吏畏怯爭言宜招納驤曰是爲民稔患耳因處畫斬捕方略咸就

捕部內肅然召爲主客郎中出爲夔路憲知明州提舉
洞霄宮卒年七十三璩秀眉冰骨樂易靜退孝友蘄平
文章滌麗復以政事彰聞幸德勵行有宿儒循吏之風
有文集二十卷賦二十卷

將樂令陳君益攄

陳攄字君益鄞人元祐三年進士紹聖間宰南劍之將
樂敦崇學校獎進士類政尚愷悌先是邑民家舉一子
富室不過二子餘悉棄之攄至論以天性申以令甲犯
者窮治自茲民無不舉子者男以陳名女以陳氏後卒

於官邑人祠而祀之。遇旱禱雨輒應。隣境淫雨亢暘，乞靈祠下，咸遂所祈。部使者請於朝，賜廟額曰旌福。

知新昌縣劉德霖滂

劉滂字德霖，武義人。自少誦說，輒能屈其師。登大觀己丑進士，調知新昌縣。縣俗嗜鬪，令到輒移病去。以他吏攝之，滂臨以誠。未幾，稱治。雖旁邑訟不能決者，多請就滂決之。蔡京與滂相，爲布衣交。滂至京師，京曰：「吾故人，有孫耶？」除勅令所刪定官，欲挽滂爲黨。會常璠書詩屏間，京疑其誡已，屬滂踪跡之。且遷官，滂曰：「此胡爲及我？」

哉京聞之不悅。滂亦拂衣去。坐是十年不調。建炎中起知建昌軍。舊守威權不立。兵習驕悍。邀求無度。滂至一以法繩之。兵不勝憤。持戟入市掠人物。卽拒者刺傷之。滂捕繫追償。兵遂爲變。滂與母妻皆被害。滂好學。善屬文。與人交始終如一。聞有急。傾財赴之。居官疾惡如仇。毅然不可回奪。以及於難。朝廷旣誅始亂者。復用御史言。褒滂爲朝請大夫。

知秀州姚令則憲

姚憲字令則。嵯人以父舜明任補海鹽丞。惠利及人。後

監奏進院知秀州土豪錢安國舍匿亡命爲奸盜州縣莫敢詰憲會之并其支黨悉置於法焚其巢穴州里大安浙西大水民飢憲請輸粟萬斛以濟又自提點刑獄知平江府羣盜毛鼎等出沒海道憲設方略殲其衆除兩浙轉運判官進叅知政事後以端明殿學士知江陵每得盜不妄殺人稱長者

廣帥周勉仲自強

周自強字勉仲江山人守棘寺三十年由刑部侍郎帥廣先是仕嶺南者歿其妻若女多不能自存或流落爲

人婢妾自強奏請官爲嫁之又置接濟庫計日給錢米使其子孫得出嶺南且慮不能久乃以已俸買田三十頃聞於朝刻石著其事至今遵行之衣冠之後始無流落者

知海陵趙公舉汝能

趙汝能字公舉系出濮鄆第進士知海陵歲歉民囂聚爲亂人情洶洶能曰是非巡尉可辦卽部勒士兵設方略擒捕百餘人其黨潰散歸罪渠魁餘悉未減侔舒斬諸司多以滯訟委之剖析平允知薛林州興學教士士

風丕變官至朝散大夫知臨安府壽八十卒能清心寡欲蒞官廉平遇事剛決有仁者之勇

仙居縣尉薛彥益朋龜

薛朋龜字彥益鄞人政和八年進士授仙居縣尉值歲飢道殣相望剽掠四起朋龜請於郡發粟賑之民多所全活而弭盜有法境內悉平改楚州司錄適靖康之變楚師勤王者歸道州境郡守薄其稿輒鼓噪爲亂朋龜急走軍中諭以禮法隨發府金犒之軍始帖服不敢譁任滿擢奉議郎去民遮道留之曰微薛公我其魚肉矣

臥轍不得行。監司上其狀。擢監行在登聞鼓院兼權工部郎中。守正不阿。彈劾權貴人。一時皆爲避去。後知衡州。致仕。與汪思溫等結社林下。後進多從之。考德問業。稱爲四明五老云。

知成都蕭德起振

蕭振字德起。平陽人。登重和進士第。調婺州兵曹。婦翁許景衡赴闕。因餞行。請曰。公至朝廷。願勿見薦。今執政多私其親。宜爲時華弊。景衡然之。高宗幸維揚。東南震恐。一日發卒數百。挾刃斬儀門人。振亟往諭以禍福。衆

遂定秋滿數年不調執政交薦召拜監察御史以親老求去章七上遂得外補未幾召爲太常少卿遷工部侍郎以議和異議謫知台州起知成都府適軍儲缺奏乞留對羅米八萬斛以足軍食總計者弗便媒孽於朝再謫池州遂代其任既而專用羅織培植其民民愈思振事聞亟遣振往成都父老聞之歎呼載道以治最加敷文閣學士卒於官

上虞令陳宜之炳

陳炳字宜之崇德人嘗令上虞有西溪湖諸水利及三

鄉中廢爲田。叅政張綱嘗浚復。勒石紀其事。歲久。豪右復據之。夏大旱。民持綱所刻石。請復湖。豪右撓沮之。綱奮曰。今寧以罪去。必不忍畏避。強禦委棄。三鄉民命也。卒浚復之。百姓歌曰。前復湖。張叅政。後復湖。陳縣令。與我衣食。全我命。除提轄。文思院。炳恬退。雅正居。官務行。所學興。利除害。以身任之。有退庵文集十五卷。

三山幕莫叔方琮

子若忠若晦若冲附

莫琮字叔方。仁和人。建炎亂。避地崇德。因家焉。以特科。歷四明三山幕。性行端飭。耻龍隨五子。元忠若晦似之。

若冲若拙俱第進士。世比燕山五寶元忠。字子直。知義
烏。歲歉。勸分賑之。判德安。撫惠貧民。新學造士。滿去。人
皆思之。居鄉。率同志。合辭當路。請沒官田。增學庠。爲養
士費。又謂齒尚於鄉。偷明於學。歲時必造學宮。習長幼
之儀。鄉黨尊異之。若晦。字子明。守宜春。蠲逋舉墜。後守
嚴州。有虎患。若晦示恩信於民。虎遂遠去。陞湖廣南庠
提舉。若冲。字子謙。知吉安。吳江有聲。除司農簿。輪對時
用事者。議開邊。若冲諫沮之。出知岳州。兵荒盜起。督捕
賑發。境內帖然。知全州。漕司檄解軍糧。州處湘源。壤高

吏治

卷之二十六

四

光緒

易涸客舟裝糧糧絕不至若冲遂發官帑造舟搬運率先諸郡明年靖江暴水民賴舟以濟最聞除大理丞丐祠歸有語溪文集十卷行於世

知袁州王與道師心

王師心字與道金華人登政和八年進士調海州沐陽縣尉收剽賊米江境上詔改承奉郎知長沙縣政事詳明累遷太府丞進樞工部侍郎克賀金國生辰使還除知袁州時秦檜方用事監司郡守皆爭獻羨餘以希進師心獨取以代貧民逋租改知衢州通判遷知洪州克

江南西路安撫使轉運判官張常訐前帥張宗元所與
張浚詩言於朝欲并中傷之詞所連及者百餘家師心
隨宜救庇多賴以免會檜死事息召還除戶部侍郎奏
宜塞侍門開言路生財不如節用上勞問甚渥且曰卿
以不附秦檜故去國久朕知卿未嘗忘也遷樞吏部尚
書兼侍讀浙東水災克兩浙安撫使寬逋債振乏絕民
不流亡改福建路安撫使時虜將渝盟師心蚤夜憂念
至忘寢食條上求人才通下情擇將帥等事言甚剴切
乾道初以左奉議大夫致仕卒謚莊敏

隆興府司法劉方叔鎮

李父祖向兄銓附

劉鎮字方叔，樂清人。李父祖向，深究經旨，爲學者所推。與鎮及其兄銓相繼登紹興第，時稱石缸三劉。鎮存心明恕，守法不苟。嘗任隆興府司法，獄有重囚九人，款已具，將論報。鎮獨察其寃，重行訊問，果得其情，告於郡，悉免之。移武義丞，築溪塘數百丈，瀦洩淮，溉民食，其德政，知長溪，政績尤著。遷通判隆興府卒。

知長洲虞賓

虞賓，餘姚人，舉進士，知長洲縣。縣多大姓黠吏，亂法亡

度賓焚鈕之皆屏息自保無敢橫歲侵民無益藏部使者猶董宿負賓閣文移不省及去縣民立石頌之終翰林承旨

知臨安汪汝直思溫

弟思齊附

汪思溫字汝直鄞人登莫儔榜進士授雄州教授調餘姚令築隄浚湖民信愛之欽宗以諸王就傳擇除贊讀思溫與弟思齊並命除吏部員外郎出守三衛時有自稱祁王過郡府史請避郡治以舍思溫不許未幾柔福帝嬖過縣將械尉思溫亦不許亡何而二人皆坐詐冒

夷治

卷之三十六

七

光緒堂

一時以思溫爲有識。遷司農太府少卿。知臨安。浙江以漁舟濟人中流。弭楫以邀重鑑。風暴至。輒沉溺。而善泗者利其錢物。以登岸。思溫悉捕繫。論殺。更爲大舟。擇不如式者悉汰之。時相秦檜嘗以故人屬薦舉。思溫曰。使可薦。誠不待相言。不才相言無益也。有旨。管政府檜欲以相府儀制稍異。執政府益持不可。檜怒。罷去。食祠祿。凡十有八年。官直顯謨閣。以終壽。八十一。

知候官程喬仲梓

程樟字喬仲。松陽人。資稟粹和。局度夷曠。文史之外。無

他嗜好事繼母以孝聞初官連州司理妖民龔陸以左
道具獄推究其誣誤者數百人改知侯官聿新學宮日
與博士弟子講學習射彬彬向風晉守蘄州政尚簡靜
置平糴倉以濟民飢糴廣東西路憲使凡所舉刺不市
恩不避怨而獎誘後進尤拳拳焉故其卒也執筆作誄
者數十百人

通判興國軍蔣仲可行簡

蔣行簡字仲可永嘉人器度凝審登紹興第主仙游簿
四川制幹滁州倅監明州市舶務改官知海鹽縣治有

聲還朝哀平生著書五十篇。雖樞言上之通判與國軍。
值大旱疫從一馬二卒。齋藥療民。知峽州常德府。湖北
提舉沅辰澧靖四川安撫諸司。舉異績。召對不果。用知
處州。時韓侂胄傾趙汝愚。謫貶至死。行簡痛其冤。因驟
感疾不起。

知武康范茂寬溶

范溶字茂寬。賢良浚之兄。以祖任爲郊社齋郎。歷司理
士曹。知歷陽武康二縣。惟通判饒州。溶練熟吏事。於決
獄尤詳明。三爲刑官。再治邑。皆以平恕稱。在潭淵日有

毆婦人傷甚者四十九日而婦人死曰破骨法限五十日而創傷辜不踰月今四十九日矣脫不破骨能無冤乎生固不容剔腓以辨今死且腐骨可驗也驗之實止創傷遂得不死武康父老訴前令定物力溢故數錢千百十餘萬科輸不前欲更之吏白板已上郡湏三載可改曰是困吾民一日不可可三年乎立除其十之二繼列其弊白於郡追易前板民以爲利及在饒州值旱災徧走郡祠竭力禱雨因得疾而卒

知衡州王剛夫瑛

兄瑛附

王琰字剛夫其先臨川人父裕來爲諸暨令遂家焉琰敏悟絕人博洽墳典由分寧尉累遷知衡州所至有聲胡銓嘗薦之有曰治經有行亞西漢之名儒惴惴無華實東都之循吏識者以爲確論兄臧字寶臣知通州行業與琰齊名時以爲二難

象山簿趙德老彥逾

趙彥逾字德老鄞人紹興三年進士授象山簿以治才稱性介潔視食墨若警事至卽決獄無冤滯嘗於縣東南史家涇開河渠千餘丈以利漑溉民甚德之因名爲

主簿河後守蜀尤多善政。饋遺不入公府。將出蜀。盡以俸餘聚九縣之族分給之。李心傳誌紹興以來蜀帥可名者數人。彥愈與焉。後守鄉郡。以覲文殿學士。終於家。

知蒲城朱藻

朱藻。縉雲人。初官漢中簿。兼尉。南渡以來。夷陵之士鮮有登第者。藻爲考官。所取皆名士。向學者始衆。知蒲城。縣積逋以緡計十餘萬。郡吏迫以輸期。藻曰。與其橫歛於民。寧得罪於郡。卽日罷歸。先是邑有點寇。前令莫敢誰何。藻至。悉置於法。邑民快之。爲立生祠。官終煥章閣。

待制

知宿松徐彥才良能

徐良能字彥才蘭谿人紹興五年進士歷知宿松安吉二縣皆有惠政其在宿松撫流亡勸勸課不以土產供饋遺前政私增俸給盡削去之吏白舊例所當得則曰此賊也欲以此餌我邪聞者皆服其廉及爲安吉則竭力以賑艱食之民除水災之賦民爲之肖像祀於學宮及刻石以紀其政去之日民爭致贈一無所受待次家貧至出產以給食處之泰然爲御史檢法官除太常博

士拜監察御史遷殿中侍御史給事中封蘭谿縣開國男又居言職凡所開陳皆當上意後以疾在告除龍圖閣待制以終

知江陰貝聖美欽世

貝欽世字聖美上虞人紹興中進士授西安尉調武康丞居官廉介太守王十朋表薦之改知江陰浚運河數十里溉田無算而民不知勞事聞詔增秩授建康簽判以疾卒於家

知雩都黃退翁邦彥

黃邦彥字退翁，縉雲人。知零都縣，治有政聲。民甚德之。吏以治盜請。邦彥曰：「以民視民，何忍爲盜？」作廉寬公勤四銘刻於邑，治以勸後人。盜風遂息。立朝，議論忠鯁，不畏強禦。人多忌之。官至國子博士，轉知興化軍。陞授官講朝散大夫。其廉潔之操，自筮仕以至宦成，如一日。

監登聞檢院袁君載采

袁采字君載，西安人。登進士第四，宰劇邑。以廉明剛直稱。諭民繩吏，皆有科條。著爲三志。終監登聞檢院。祝禹圭曰：「其行曰廉而近介，公而過剛，勤而苦節。當時以爲

實錄

知江陰徐希顏綱

子龜年逢年附

徐綱字希顏崇德人初爲太學生柄國者方主和議綱率同舍疏六事乞斬誤國賊臣不報直聲振於天下已而謁選歷官江陰令適旱飢流移四集綱條畫利害請臺郡發廩分塲便糶全活甚衆入除提轄文思院著邊防兵政十六事歷進忌者沮之未及行綱益以八事復上進又寢不報力丐祠倅湖州子龜年逢年皆舉進士龜年字朋老宰江寧專務德化歲飢制帥黃文昌委以

荒政龜年躬走阡陌家賑人給所全活者如父緡之於江陰嘉定間守肇慶陞薛翰對剴切治郡清靜解去父老挽留之除監察御史首言分別邪正及慎惜名器出知温州改徽州所著有澹軒文集

休寧宰陳元和曦

孫大震玄孫伯四附

陳曦字元和鄞人紹興八年進士除休寧宰政尚清儉守法不阿改國子正置講議司日夕與諸生論天下國家事必懇懇言其治已治人之要甲子高宗幸太學召對語曰今學者言卿講說訓導可以爲師朕欲觀卿之

道至於有成。職對曰：陛下若復興太學，此帝王盛德事也。上喜，擢給事中，居六載，彈劾不避權要。上嘗謂侍臣曰：惟陳曦言事最誠實。後自知制誥，知濠州政，稱第一。呂好問薦其才，召拜翰林學士。上疏言：四鎮五帥之材，上許之，卒於官。孫大震、玄孫伯駒俱登翰林，時人稱爲祖孫三學士云。

兩浙名賢錄卷之二十六終